

**ji dem û dewranên cuda cuda yê wêjeya  
cîhanê**

## **P E N D N A M E**

***Berhevkirin, bijartin û wergerandin:  
Husein Muhammed***

### **Aristoteles**

Mirov heywanê siyasî ye.

Hema ku derfet û delîv hebe, pîrriya mirovan dê xerabiyê bikin.

### **Mixayîl Bakunîn**

Bisînkirina azadiyê qaşo bo parastina wê şaşiyek mezin e.

### **Francis Bacon**

Kirêtiya meymûnan zêde ye ji ber ku ew pîrri dişibin mirovan.

Derman ji derd kembaxtir e.

Yên temaşe dikin pîrri caran ji listikvanan baştir dibînin.

Yê her kes jê ditirse, baştir e bi xwe jî bitirse.

Mirovê dixwaze tol û heyfê hilde, birînen xwe yê dê sax bibana kul dihêle.

Bêdengî qenciya ehmeqan e.

Yên zêde xweperest ta xaniyan dişewitînin daku ji xwe re hêkekê biqelînin.

### **Honoré de Balzac**

Piştî jin mêran dikin mih, jê re dibêjin: tu şêr î.

### **Charles Baudelaire**

Huner çi ye? Fahîşetî ye.

Xwedê tekane kes e ku bo bikare desthilatîyê bike pêwîstî bi hebûna xwe nîn e.

Jiyan nexweşxane ye ku her nesax lê dixwaze nivîna xwe biguherîne. Yek dixwaze li ber tenûrê binale, yek din bawer dike ku dê li ber pencereyê sax bibe.

Dewletên mezin li ser bingehê xerabiyê û dînên (olên) mezin li ser bingehê xapandinê tên afirandin.

### **Henry Ward Beecher**

Diviyabû her mirovekî gorristanek heba daku kêmasiyên heval û hogirên xwe tê de veşêre.

### **Ebu Zeyd el-Belxî**

Nobetgir çend gelek bin, hind asantir nehînî aşkira dibe.

Yê ji nehîniya xwe re li nobetdarekî digere, wê nehîniyê aşkira dike.

### **Arnold Bennet**

Heke mirov fêrî reşbîniyê bû, ew jî mîna geşbîniyê xweş e.

Rojnamevan hin tiştên dizanin nerast in dibêjin bi wê hêviyê ku heke her dubare bikin ew tişt dê *bibin* rastî.

### **Ambrose Bierce**

Mejî alavek e ku em pê difikirin ku em difikirin.

Hemî dîn in lê yên dizanin dîniya xwe şirove bikin filozof in.

Siyasetmedarê paşverû ji neheqiyên heyî hez dike. Siyasetmedarê pêşverû dixwaze hin neheqiyên din bîne şûna wan.

### **Josh Billing**

Jiyan kurt e lê dîsan jî têra hindê dirêj e ku mala mirov wêran bike.

Bo ku tu navşirîn bî, bi aşkirayî bide û bi dizîkî bistîne.

Heke heywanan jî aqil heba, ew jî dê mîna me bêaqil ban.

### **Otto von Bismarck**

Heke tiştekî wek prensîp bipejirîne, tê wê wateyê ku ticarî di pratîkê de bi cî naîne.

Siyaset ne zanist e, huner e.

### **Ebul-Hesen el-Bistamî**

Koriya aqil derdê bêderman e.

### **Björnsterne Björnson**

Di siyasetê de rastî nayê bikaranîn ta pêwîstiya kesekî pê nebe.

### **William Blake**

Ma azadî bo çi ye heke bênfirêhî nebe?

Yê dixwaze lê naxebite, belayê diçîne.

Her çavek bi regekî dibîne. Çav çawan be, tişt wisan e.

Xema zêde dikene. Şahiya zêde digirî.

Dêra zemanê me Mesîh serberjêr çarmix li xaçê dide.

Afirandina gulek biçûk kar û xebata sal û zemanan e.

Di çavê yê tema û nemerd de qirûş bedewtir e ji rojê û çizdana bi pareyan ve kevnbûyî delaltir e ji wişiyek tirî.

### **Jakob Bosshart**

Hertim tê pirsîn ka filankesî çi kiriye. Divê carinan bê pirsîn ka wî çi nekirî hiştiye.

Hêvî difirre, kirin bi piyan dimeşe. Lew ew herdem hind dûrî hev in.

### **Sir Thomas Browne**

Mirov mezintirîn dijminê xwe ye, û - wek ku hatiye dîtîn - celad û serjêkerê xwe jî.

Guman tê de nîn e ku gelek kes li ser dinyayê wek ewliya hatine binavkirin lê dê li bin dinyayê ticarî ne ewliya bin.

### **Elisabeth Browning**

Xem dikare şahiya şaşhatîfamkirin be.

### **Robert Browning**

Raman giyanê kirinê ye.

### **Henry Buckle**

Her dîn û olek serdest carekê xafilî bû.

### **Edmund Burke**

Koletî li herderê heye. Ew mîna giya li herderê şên dibe.

### **Robert Burton**

Ew pozbilind bûn ji ber ku ne pozbilind bûn.

Ax, qelem dikare çend ji şûr zalimtir be.

Dîn û aqîlsivik pirrî caran rastiye dibêjin.

### **Samuel Butler**

Pare yan jîyan! Talanker dihêle mirov bibijêre lê jin herduyan dibe.

Tê gotin ku pare sedema hemî xerabîyan e. Bêguman nebûna pare jî.

Ti kes mîna şahidan şaş nabe.

### **Lord Byron**

Ecêb e lê rast e çimkî rastî herdem ecêb e.

Heke bêalî bim, hemî alî dê bixeyidin.

### **Jean Calvin**

Divê em ji bîr nekin ku Şeytan jî dikare karên baş bike.

### **Albert Camus**

Em li dinyayekê dijîn ku divê mirov lê bibijêre ka dixwaze qurban an jî celad be - ne ti tiştê din.

### **Giosuè Carducci**



Dema sîbera bejnboştan dirêj dibe, dema avabûna rojê ye.

### **Thomas Carlyle**

Ji kêmasiyan a herî mezin ew e ku mirov ti kêmasiyan di xwe de nebîne.

Ne giring e bibînî ka tiştê li dûr çî ye lê giring e tiştê li ber dest bikî.

Tevî ku hemî dinya xerab bibe jî, tu dê tenê carekê bimirî.

Heke Îsayê Mesîh îro bê ser rûyê erdê, kesek dê wî li xaç û çarmixê nede. Xelk dê abngî wî ser firavînê bike, dê guhdariya wî bikin ka ew dê çî bibêje daku henekan pê bikin.

### **Gaius Catullus**

Ji kenê bêterz tiştêk bêterztir nîn e.

### **Miguel de Cervantes**

Gelek kes diçin hiriyê lê bi xwe cewkirî vedigerin.

Carinan dema mirov li tiştêkî digere, tiştêk din dibîne.

### **Nicolas-Sébastien Chamfort**

Dîn ji aqildaran pirrtir in. Û di aqildaran de jî ji aqildariyê gelectir dînê heye.

Xwezî şûm tembel û bêaqil jî kêmbêj ban.

Ji hezkirinê xweheziyê kêr bikî, hema ti tişt namîne.

### **Geoffrey Chancer**

Şêwaz ramanan dixemilîne.

Dema tiştêk li me tê qedexekirin, ji nû ve dilê mirov diçiyê.

### **G. K. Chesterton**

Romana baş rastiya serlehengê xwe vedibêje, romana bed (nebaş) rastiya nivîskarê xwe vedibêje.

Yên bi rastî jixwebawer in hemî li şêtxaneyan in.

Rojnamevanê ew e ku tê gotin "Lord Jones mir" ji wan kesan re yê ticarî nizaniye ku Lord Jones hema her hebûye jî.

### **Winston Churchill**

Diktator paş û pêş li pilingan siwar dibin û newêrin  
jê peya bibin. Û piling jî hêdî-hêdî birsî dibin.

Herdem amade me fêr bibim tevî ku hertim hez  
nakim jî ku têt fêrkin.

Carinan mirov li rastiye diqelizin û pê dikevin lê  
pirraniya wan radibin ser xwe û bi lez meşa xwe  
didomînin mîna ku qet tiştê neqewimibe.

Kembaxtirîn belaya hatî serê gelê Rusyayê welidîna  
Lenîn bû û belaya duyemîn kembax - mirina wî.

### **Xelîl Cibran**

Zarokên we ne zarokên we ne. Ew keç û kurên  
bêriya Jiyanê ne.

Hûn dixwazin dem bikin çem û li ber rûnin û binerin  
ka ew çawan diherike.

Yê difirre, divê bixwişe jî.

### **Marcus Tullius Cicero**

Ti tiştê wisan dûrî aqil nikare bê gotin ku ti  
fîlozofekî ta niha negotibe.

### **Georges Clemenceau**

Siyaset mîna alavekê ye ku komek mezin a zelaman  
pê mijûl e daku mêşekê pê ji erdê rabike.

### **Jean Cocteau**

Diviyabû neynik û awêne hinekî bifikirin ji berî  
wêne di xwe re biteyisîn.

Bêguman ez ji hebûna şans bawer dikim. Heke ne  
wisan be, ez dê çawan serkeftina wan ravebikim ên  
ez jê hez nakim.

### **Samuel Taylor Coleridge**

Ya ji dil be dikeve dil.

### **Charles Colton**

Heke te ti tiştê gotinê nebe, ti tiştî nebêje.

Kes hindî wî kesî hez nake ji nehîniyan ê naxwaze  
wan nehîn bihêle.

Gelek kes rast dibêjin dema dibêjin ku ji dewlemendiyê hez nakin. Mebesta wan dewlemendiya kesên di ye.

### **Cyril Connolly**

Yê serdestî hestên xwe be, koleyê Aqil e.

Henekbêj ne kesên bextiyar in.

### **Joseph Conrad**

Mirov tiştên dîrokî dikin lê ne di serê xwe de.

### **Ernest Coquelin**

Ez xesûyekê dinasim ku bi berçavk ve dinive daku di xewnên xwe de zelal bibîne ku zavayê wê dikeve belayan.

### **Abraham Cowley**

Mirov di ser hertiştî re ji xwe hez dike lê dîsan jî nikare bi tenê be.

### **Brana Crncevic**

Herî zêde ew derewan dîkin ên herî baş rastiyê dizanin.

Hesr baştirîn hevalê mirov e. Û heval li hevalî siwar dibe.

Şoreş zarokên xwe naxwe lê herçi mezin in divê li xwe hişyar bin.

Yên kêmnifer pirsên biçûk dîkin û bersivên mezin werdigirin.

Ti paşeroj nîn e ya carekê ne pêşeroj bû.

### **Oliver Cromwell**

Divê bi qîrînên "her bijî" bawerî nebe çimkî her ew heman mirov dê bi kêfxweşî biqîrin heke em li sêdareyê bên daliqandin.

### **El-Cuneyd**

Heke min bizaniya ku li ser rûyê dinyayê zanînek ji ya me sofîyan binirxtir heye, min ê xwe bigihanda wê.

### **Anton Çexov**

Aqildar dixwaze bielime lê bêaqil dixwaze bielimîne.

Mirov çî bawer bike ew e.

Asantir e mirov ji feqîran bixwaze, ne ji zengînan.

Zanistiya neteweyî nîn e wek çawan matematîka neteweyî jî nîn e. Tişta neteweyî be, êdî nezanistî ye.

Mirin tişte bitirs û erjeng e lê hê jî erjengtir û xoftir ew e ku mirov herherî bijî û ticarî nemire.

Nîn e duşem a ciyê xwe nede sêşemê.

### **Dante Alighieri**

Ti êş û jan hindî wê mezin nîn e ya dema mirov di belengazî û hejariyê de demên bextiyariyê tîne bîra xwe.

### **Daniel Defoe**

Her mirov dê zordar be heke bikare.

### **Thomas Dekker**

Aha rusiyan edetek pirr xweşik heye: li lingê xwe dixin, dibêjin ku pare nîn in û deynê xwe nadin.

Temen jî mîna evînê ye - nikare bê veşartin.

### **Charles Dickens**

Pirtûkên wisan hene ku bergên wan baştirîn tişta wan e.

### **Denis Diderot**

Tirsa dojhê (cehenemê) ji dilê yê file derbixî, dê dînê wî jî jê derbixî.

Bi qasî ku kêmbawerkirin xeter e, wisan zêdebawerkirin jî xeter e.

### **Marlene Dietrich**

Min ticarî nedîtiye jinek dide pey zelamekî tenê ji ber ku lingên wî bedew û xweşik in.

### **Diogenes Laertios**

Civak bê qanûnan nabe. Lê heke qanûn xerab bin, mirov di civakê de ji li derî wê bextreştir e.

### **Benjamin Disraeli**



Bi peyvan serdestî li mirovan tê kirin.

Dema bixwazim pirtûkekê bixwînim, yekê ji xwe re dinivîsim.

Sê celeb derew hene: derew, makederew û statîstîk.

Ji kesekî re basa wî bi xwe bike, û ew dê bi saetan li te guhdar be.

### **Milovan Djilas**

Dara jiyane herdem şên e; hemî teorî gewr e.

Belkî ez dogmatîk im, bi dogmatîkî dijî hemî dogman.

### **John Donne**

Ti kesek ne girav e, bi xwe serbixwe; herkes beşek ji bejayiyê ye, parçeyek ji tevayiyê.

### **Fyodor Dostoyevskî**

Hezkirin ne evîn e. Mirov dikare di heman demê de jê hez bike û binifirîne.

Pend jî dibêje: "Temen dirêj bûye lê aqil na."

### **John Dryden**

Divê asin bê çemandin dema germ e; dema tu betal  
ew dikare bê biriqandin.

### **Thomas De Quincey**

Dost jî hindî dijminan talûke ne.

### **Alexandre Dumasê biçûk**

Nîrê zewacê hind giran e ku divê du kes wî hilgirin.

### **Bob Dylan**

ez naxwazim bibim bach. mozart. tolstoy. joe hill.  
gertrude stein an james dean / ew hemî mirî ne.

### **Ibn Ebbas**

Nivîsîn zimanê dest e.

Ti guneh ne mezin in heke mirov poşman bibe û  
lêborînê bixwaze, û ti jî ne biçûk in heke mirov bi  
serhişkî pê ve bimîne.

Zanîn bêhesab heye: ji zanînê giyanê wê bigirin û  
derqepûşka wê bihêlin.

Tu hişmendiye li kû bibihîzî, bigire çimkî di ser hişmendana re kesên din jî dikarin tiştên aqilane bibêjin, wek çawan kesên ne tîravêj jî dikarin carinan bi hedefê bikevin.

### **Marie von Ebner-Eschenbach**

Hevalên dilpak kêma in - yê wan dixwazin jî ne gelek in.

Axayê îradeya xwe û xulamê wijdana xwe be.

Em pirrî caran qencyê ji hev dixwazin tenê daku kêmasiyên me bikarin xweştir belav bibin.

Çi ye ku mirov gelek caran dibêjin bêaqilî ye? Ew aqildarî ye ya ew tê nagihin.

Yê bi azadiya vîn û îradeya mirovan bawer e, ticarî ne ji kesekî hez kiriye û ne jî kesek nifirandiye.

### **Efleton bn. Platon**

#### **Albert Einstein**

Zikê vale ne şewirmendek baş ê siyasî ye.

Heke teoriya min a relatîviyê rast derbikeve, Elmanya dê min elman û Fransa min cîhanî

bihesibîne. Heke teoriya min şaş derbikeve, Fransa dê bibêje ku ez elman im û Elmanya dê bibêje ku ez cihû me.

### **Îmam Elî**

Mirov wî tiştî dinifirînê nas nakin.

Du celeb roj hene: hin li alî te ne lê di ser de neçe, hin jî dijî te ne lê bênfire be: bi herduyan jî tu tê ceribandin.

Bawerî zanîna dil e.

Hêz û bawerî destbira ne û ti ji wan bê ya din nabe. Bawerî bingeh û hêz çavdêr e: ya bê bingeh be diruxe, û ya bê çavdêr be wenda dibe.

Yê ji xwe razî be, dê nefretên xelkê lê bibarin.

Dema dirêj jî dawiyê her kurt e.

Mirî saxan fêr dikin.

Hesûd bi te razî nabe ta yek ji we herduyan neyê kuştin.

Ji dijminan yê diwartirîn ew e yê dekûdolabên wî veşartî ne.

Koleyê xwestekên xwe bînirxir e ji koleyên rastîn.

Nizanim ka kîjan tehlîr e: mirina yê zengîn an jiyana yê feqîr.

Zanîn mîna agir e: ew kêr nabe heke jê bê wergirtin.

Li gunehên biçûk hişyar bin çimkî ew rê dibin ên mezin.

Ziman xizmetkarê aqil e.

### **Henry Havelock Ellis**

Bo ku kesek bikare rêveberiya mirovan bike, divê piştî xwe bide wan.

Divê mirov şerm neke ji tiştî Xwedê şerm nekir biafirîne.

### **George Eliot**

Lawir ji hevalan ên herî baş in - ne tiştêkî dipirsin, ne jî lomeyan dikan.

### **Ralph Waldo Emerson**

Dawiya dawîn her qehreman dibe serêşî.

Mirov xwedayê kavihbûyî ye.

Her nûbûnek tenê rûpoşek e ku di nav re nûbûnek hê kembaxtir heye ku hê newêre navê xwe bide diyarkirin.

### **Erasmusê Rotterdamî**

Hunera fêrisane ya peyivînê bi pirranî derewkirina hunerane ye.

Ez bi piştrastî dizanim ku dema nêçîrvan bên dike pîsatiya tajiye xwe, ew bawer dike ku bên dike misk û emberê.

### **Ebdullah el-Ermewî**

Hezkirin û kêmasî bi hev re baştir e ji kerb û zengîniyê.

### **Xelîf Evdilmelik**

Berê dema ez li nav zeviyan digerîm, li xwe hişyar bûm daku pê li kuliyan nenim lê niha waliyê min el-Heccac dibêje ku wî bi sedan mirov kuştine, û ne xema min e.

Bêdengî xewn e, peyivîn şiyarî ye.

### **Ludwig Feuerbach**

Mirov çî dixwe ew e.

Bo dîn (ol) tenê tişta pîroz rast e, bo felsefeyê tenê tişta rast pîroz e.

### **Henry Fielding**

Rojname her heman dirêj e, nûçe hebin an nebin.

Hema her bijîşkî (nojdarî, doktorî) êşek li ber dilî şîrîn heye.

### **F. Scott Fitzgerald**

Hûn qehremanekî nîşanî min bidin, ez ê trajediyekê ji we re binivîsim.

### **Henry Ford**

Pare mîna dest û piyan e - bi kar bîne yan dê hişk bibe.

### **Anatole France**

Heke pêncî milyon jî pesna bêaqiliyê bidin, ew dîsan jî bêaqilî ye.

Dîn xizmetek mezin bo evînê kiriye ku ew kiriye guneh.

Li gor sirişt û tebîetê mirovan e ku bi hişmendî birame û bi bêhişî tev bigere.

### **Benjamin Franklin**

Derbeyên biçûk dargûzên mezin dixin.

Ji dijminên xwe hez bike çimkî ew te ji kêmasiyên te agadar dikin.

Birs (Birç) serê xwe di mala yê dixebite re dertîne lê newêre tê bikevê.

Ew wisan xwenda bû ku bi neh zimanan dizanî bibêje "hesp", û wisan nezan bû ku bo siwarbûnê ji xwe re çêlek kirî.

### **Fredrick II ê Mezin**

Heke bixwazim bajarekî ceza bikim, ez ê filozofan bikim serokê wî.

Kêm kes difikirin lê dîsan jî hemî dixwazin biryaran bidin.

### **Robert Frost**



Nîv dinya ji mirovan ew kes in ku tiştekan wan ê gotinê heye lê nizanin bibêjin; nîva din ew in ku ti tiştekan wan ê bibêjin nîn e lê bêdeng nabin.

### **Thomas Fuller**

Hemî dinya dîn e ji bilî min û te û carinan bawer dikim ku tu jî dîn î.

Zimanê wî hind dirêj bû ku karî pê stoyê xwe jê bike.

Heke qurûşekî bidî zirnevan daku lê bide, divê du qurûşan jî bidiyê daku bes bike.

Diz jî dikare bibe camêr, heke dizîkeriyê ew zengîn kiribe.

### **John Kenneth Galbraith**

Ji dramaya enflasyonê tenê Hamlet kême.

### **John Galsworthy**

Sernavên nûçeyan di rojnameyan de ducarî hindî bûyeran mezin in.

### **Mohandas Gandhi**

Yê bixwaze bi dilê hemîyan bike, dê dawiyê bi dilê kesekî neke.

### **Charles de Gaulle**

Ez gihame wê encamê ku siyaset gelek giring e lew divê ne di destê siyasetvanan de be.

### **John Gay**

Mey û ereq zû dibe dost û heval.

### **Jean Genêt**

Dil me diruxîne. Em qaşo serdestên qencyê ne lê di rastiyê de em koleyên miskînê û nermîçokiyê ne.

### **André Gide**

Rengê rastiyê gewr e.

Xewa herî bedew jî xwe li ber şiyarbûnê nagire.

Pêşeroj, ax min çendî ji te hez dikir, ey bêsoz.

Qeşe bi awayek wisan li Mesîh xwedî derketine ku heke mirov bixwaze ji qeşeyan bifilite, divê Mesîh jî bi wan re biavêje.

### **Allen Ginsberg**

Baş e ku hemî hukûmetên xerab diruxin / tenê  
hukûmetên qenc nakevin / û hukûmetên wisan ta  
niha nebûne.

### **Jean Giraudeau**

Ji xwendina qanûnê baştir ti awa bo  
dewlemendkirina xeyalan nîn e. Ti helbestvanekî  
ticarî sirişt û xweza wisan bi azadî şirove nekiriye  
wek ku dadwer (hiqûqnas) rastiye şirove dikin.

### **Johann Wolfgang von Goethe**

Em ji gunehên xwe dibehecin, dema em wan di  
kesên din de dibînin.

Armanca jiyane jiyane bi xwe ye.

Kerb û qehr hestek erjeng e, û divê mirov ji kesek  
wisane, ê nikare biruxîne, neqehire.

### **Nikolay Gogol**

Asteng çeng û baskên me ne.

Hertiştê dûrî aqil li dinyayê dibe.

De vêca were û bizane ka mirov çi ye! Ew ji Xwedê bawer nake, lê hema heke serê poza wî bixwire, qaşo dê bimire - ew ji hindê bawer dike.

Di dîroka mirovatîyê de gelek sedsalên tamam hene ku bawer dikim ji ber ku ne pêwîst in, dikarin bîn jêbirin.

Mirov tenê taybetmendiyeke xerab li rex neh taybetmendiyeke çenc hebe, mirov dê dîsan jî wek ehmeq û neqenc bê navandin.

### **Oliver Goldsmith**

Heman felsefe di govê ve dikare siwariyek çeleng lê li rê siwariyek bêpê be.

Tenê bêaqiliya armancên me ji hebûna me bêwectir e.

Armanca rastîn a axiftinê ne diyarkirina lê veşartina daxwazên me ye.

### **Samuel Goldwyn**

Her kesê diçe cem psîkiyatr, divê serê xwe bide vekolandin.

Ka em çend klîşeyên nû çêbikin.

### **Maksîm Gorkî**

Navincî û dîn - îşte du tîpên nivîskarên îroyîn.

Baweriyek wisan, baweriyek mesîhane ku tenê çîna karker hêza giyanî diafirîne, ku tenê ew e xwêya xwarinê, baweriyek kembax û ruxîner e.

Herkes dizane ku pîrr diwartir e peyvan bike kirin ji ku kirinan bike peyv.

### **Baltasar Gracián**

Pîrr normal e ku bo sererastkirina şaşiyekê çar ên din tîn kirin.

### **Graham Greene**

Wêrekî û bistehî (cesaret) dikare nesaxiyek diwar a derûnî be.

Xewn hertim ji min re giring bûne: "baştirîn şadîkî û demboreya naskirî û pîrr erzan."

### **Robert Greene**

Nikare bibe dizek baş yê ji sêdareyê bitirse.

### **Ernesto "Che" Guevara**

Em şer naxwazin lê madem me dest pê kiriye, em êdî nizanin bes bikin.

**Paavo Haavikko**

Heke mirov bên ser hişên xwe, dê zerer û ziyaneke mezin çêbibe.

**Behmenyar el-Hakim**

Aqil heval e di tenêtiyê de.

**Nathaniel Hawthorne**

Ma çî zindan mîna dilê me tarî ye!

**Friedrich Hebbel**

"Ez xwe naxapînim." Aha ew e bextreşiya te. De hema carekê xwe bixapîne.

Gelek kes ji ti tiştî bawer nakin lê ji hertiştî ditirsin.

Bi birûskan dinya dikare bê ronkirin lê firne pê germ nabe.

**Heinrich Heine**

Divê mirov li dijminê xwe bibexşe lê ne ji berî ku ew li sêdareyê dabe.

Mixabin cemawer û girseya gel helbestvaniyê pirr kêr dinase, ew jî mîna helbestvanên me.

Xwedê dê li min bibexşe; karê Wî ye.

### **Claude Helvétius**

Ti serdem nîn e ku bi awayekî serdemê pey xwe bi xwe nede kenandin.

### **Ernest Hemingway**

Tiştê bi asanî tê nivîsîn, bi dijwarî tê xwendin.

Dijwar e mirov camêran fam bike.

Divê mirov tiştên xeyalî pêşkêş bike daku bikare rastiya bi temamî vebîşêre.

### **Ebu Henîfe**

Dinya tenê çîrok e: lew çîrokek xweş be.

### **Herakleitos**

Xweda û mirov nîrx didin wan ên di şer de ketî.

Lîstinên zarokan in helwestên mirovan.

### **Herodotus**

Heke kesek hebe pêşniyaz bike û ferman bide ku divê her kes ji xwe re irf û edetên herî baş bibijêre, her miletek piştî li ser bifikire dê yê xwe bibijêre.

### **Abdus el-Herranî**

Yê bi biharê şa nebe û bi bayê wê mest nebe û di nav boşiya gulên wê de dilê wî aram nebe, nesax e û hewcedarî derman e.

### **Hermann Hesse**

Jiyana herkesî meşîna ber bi wî bi xwe ve ye.

Mirov lihevkirinek birjiwazî ye.

Hêz û sedestî dibe xezeb li yê armanca wî hêz û serdestî ye.

### **James "Wild Bill" Hickock**

Keleş û talanker ne zêde xema min in. Dema çendekan ji wan dikujim, ên din hertim direvin.



### **Peter Hille**

Tirsîna ji Xwedê henekkirina bi Xwedê ye.

Mirov dijît ta wenda dibe.

### **Ibn Hindû**

Yê aqildar xwe bi wî tiştî nawestîne yê nikare, wê hêvî naxe ya nikare bi dest bixe û serê xwe naxe nav wan tiştan ên ne karên wî ne.

### **Adolf Hitler**

Heke ez bi ser bikevim, nişên bên dê heyranî min bin û hema ti kesek dê nepirse ka bi çi awayan bi ser ketim.

Dil û mejiyê gel tenê neynika wê ye ya serok û serdestan bi raya giştî daye xwarin.

Cihûyan wijdan keşf kiriye. Ew jî mîna sinetkirinê tişteke pîs e.

Pasîfizm newêrekiya rûveşartî ye.

### **Eric Hoffer**

"Rast" û "xelet" tenê aîdî zimanê me ne, ne aîdî rastiyê.

Çêkirina dîrokê bûye nesaxiya serdema me; pirtûka dîrokê vekirî dixwiye û herkesê bi bihayê du qurûşan zana dixwaze rûpelên wê biqulipîne.

Ne Mesîh mesîhî û ne jî Marx marksîst bû.

### **J. A. Hollo**

"Jiyan me perwerde dike", Pestalozzi gotiye. Divê lê bê zêdekirin: "pirr hêdîka."

### **Oliver Wendell Holmes**

Herkes ji me serleheng e, qehreman e, li roja bûna xwe, li daweta xwe û li taziya xwe.

Dema xwezayê nivîskar peyda kirin, amade kirin û patente kirin, ji bermayokan rexnegir çêkirin.

### **Horatius**

Qencî di navbera du xerabiyên de ye.

### **E. W. Howe**

Yek ji seyr û sosrettirîn tiştên vê dinyayê ew qedir û qîmet e ku mirovên bêkêr didin xwe.

Şerm nekin heke hûn nizanin li piyanoyê bidin, serbilind bin ku hûn nizanin.

### **Frank "Kin" Hubbard**

Mêş qet ne hindî dixwiye zîrek e; ew tenê nikare kêmtir vizevizê bike.

Dema kesek dibêje: "Ne pare lê prensîp", mesele pare ye.

Çend kes li pişt serok hene ku divê bîn ber wî daku ew çavdêriya wan bike.

Sûdeyek ji te heye ku tu feqîr bî - bijîşk dema xwe bi başkirina te ve pûç nake.

### **Victor Hugo**

Hertişt li ber serkeftinê ditewe, rêziman jî.

Azadî ji îroniyê dest pê dike.

### **Aldous Huxley**

Ma em ji kû dizanin, pa belkî ev dinya doje û cehenema kesên ji dinyayek din be.

### **Henrik Ibsen**

Siyaset giringtirîn tişt e di jiyane de - bo rojnameyan.

Hemî pêşketina ta niha xweavêtin ji şasiyekê ber bi ya din e.

Gunehek mezin e ku zanistvan heywanan îşkence didin, bila azmûnên xwe li rojnamevan û siyasetvanan biceribînin.

### **Robert Ingersoll**

Dêrê hertim alaya talankeran hildaye.

Ti tiştêk mîna hindê gewer û qenc nîn e ku mirov bindestî hiş û aqilê xwe be. Heke rastî ji te bibe, yê biserketî tu bi xwe yî.

Bandora rastiyê li ser dîn mîna bandora bombeya dînamîtî li ser qeyserê Rusyayê ye.

### **Îsayê Mesîh**

Pêşî qurmik ji çavê xwe derbîne û paşî qirşik ji çavê birayê xwe.

Jîr bin mîna maran lê bêguneh mîna kevokan.

Heke kor destê korî bigire, herdu dê bikevin kendê.

Mirar li kû be, qertal tîn wir.

### **Mehmûd Îsfahanî**

Yê nerazî be, malê zêdetir ne dewlemendiyê lê tenê tengezariyê jê re tîne.

Heke malê xwe nedî hejaran jî, hema bila dilê te bi wan bişewite.

### **Ehmed ibn Îshaq**

Hingê dema bînfirahiyê ye dema mirov nikare rewşê biguherîne.

Dijwar e mirov azad be heke bi ya edetên xwe yê xerab bike.

### **Huneyn ibn Îshaq**

Yê vedixwe zikê vale yan birsî ganan dike, bi xwe  
mirinê bi werîs bi nik xwe ve dikêşe.

### **William James**

Ji jiyane natirsim. Bawer bikin ku jiyane hejî jîne ye,  
û bi vê baweriyê ew dîtin dê bibe rastî.

### **Thomas Jefferson**

Dostê zîyan lê hatî kirin kembaxtirîn dijmin e.

Hemî hêz û serdestî ya gel e.

Welat yê saxan e, ne yê miriyan.

Ez ji dîroka paşerojê zêdetir ji xewnên pêşerojê hez  
dîkim.

Ew nîfş, ê dest bi şoreşê dike, kêman caran wê digihîne  
encamê.

Di heman demê de, ku Yezdan jiyane da me, Wî  
azadî jî da me.

Edetek zordestan heye: hin mirovan bi hin ên din  
didin îşkencekirin.

### **Jerome K. Jerome**

Ya herî baş ew e ku mirov rastiye bibêje, heke ne  
bêqam derewkerek zîrek be.

Em bo noşîcaniya yê din vedixwin û canê xwe  
diperritînin.

### **Samuel Johnson**

Yê guh nede ser zikê xwe, guh nade ti tişteke din jî.

Bê wêrekî û bîstehiyê mirov nikare ti qenciyan bike.

### **Maria Jotuni**

Heke em bibînin ka em çi ne, em ê êdî ne ew bin ka  
em çi ne.

Roj çawan dest pê bike jî, bi êvar û şevê bi dawî tê.

### **Juvenalis**

Sansûr qertalan berdide û êrişî kevokan dike.

Kî çavdêrî çavdêran e?

Rastgoyî tê spaskirin û birsîhiştin.

### **Franz Kafka**

Wan pirtûkan, ên ku me kêfxweş dikin, em dikarin, heke pêdivî be, bi xwe jî binivîsin. Divê pirtûk bivirek be ku deryaya di me de qerisî bişkîne.

Ti kesek mîna wan, ên di kûrtirîn dogeh û cehenemê de ne, bi pakî nastrin; ew, a em dibêjin strana firîşteyan e, strana wan e.

Pirî caran biewletir e ku mirov bi bend û zincîran girêdayî û bestandî be li şûna azad û serbest be.

Ti tişteke nikare mîna fotografan mirov dilsar bike.

### **Immanuel Kant**

Dema hatin ber deriyê biheştê û jê hat pirsîn: "Kî ji we dîndirist e?" yê cihû, yê file û yê misilman, heryekî û hemiyar bi yek dengî got: "Ez."

### **Konstantinos P. Kavafis**

Lezandina bi çavkorî xeter e. Mirov li xebatên pêşdemî poşman dibe.



### **John Keats**

Bedewî rast e, rastî bedew e.

Felsefe çengên firişteyan jê dike.

Heke helbest bi siriştî, wek pel ji darê diwere, pêk neyê, baştir e ku qet pêk neyê.

### **Ke'b**

Hesûdî zinarek hilû û şematok e ku piyên zanayan jî lê ditehsin.

### **John F. Kennedy**

Yên bi bidesxistina serdestî û serdaryê li piştta pilingan siwar dibin, dikevin devê wan.

Nepirse ka welatê te dikare bo te çi bike, bpirse ka tu dikarî bo welatê xwe çi bikî.

### **Soren Kierkegaard**

Mirov dikare tenê ber bi paş ve jiyanê fam bike lê divê wê ber bi pêş ve bijî.

Kes piştî mirinê venagere. Kes bê girî nayê dinyayê. Kes ji me napirse ka em kengî dixwazin têkevin, kengî derkevin.

Sebra xwedayan nedihat lew wan mirov afirandin.

### **Aleksis Kivi**

De vêca were û bi cewa rastiye bikeve nav gulistana  
evînê! Ax! Ne ti camêrî ye.

Em li ser rêya rast in û em dê bigihin rastiye heke  
em birizin jî.

Ti roj ne hind dirêj e ku şev nede pey.

Hema xwedê jî pê dikene ku diz ji dizî didize.

### **Kîsre**

Mey sabûn e ya xeman vedişo.

### **V. A. Koskenniemi**

Partî gorristan in. Karê bi wan maye ew e ku bîrdoz  
û îdeolojiyê binax bikin.

Şer jibîrkin e; berî hertiştî tê jibîrkin ka çima şer  
tê kirin.

### **Karl Kraus**

Di serê vale de ciyê gelek zanîne heye.

Psîkoanalîz ew êş û elem e ya ew dibêje sax dibe.

### **Pyotr Kropotkîn**

Jiyana mirovên ronakbîr tijî derewên li ser lihevkişî ye.

### **Johannes Krysostomos**

Dojeh û cehenem bi serkuloxên qeşeyan hatiye kevirkirin.

### **Kongfuçe**

Ji şaşiyên şerm neke.

Kembaxtirîn tirsonekî ew e ku mirov ya rast bizane û wisan neke.

Sê rê hene ku mirov dikare pê ve bigihe hişmendî û aqildariyê: rêya liserfikirîne ku gewertirîn e, rêya çavlêkirîne (texlîdkirîne) ku asantirîn e û rêya ceribandîne ku diwartirîn e.

Yê hişyar û sexbêr kêr caran şaşiyên dike.

### **Jean de la Bruyère**

Pirraniya mirovan baştirîn beşa jiyana xwe bo xerabîgihandina kesên din bi kar tînin.

Mirov tenê sê bûyer di jiyana xwe de hene: ew dibe, dijî û dimire. Ew nabîn dema dibe, dinale dema dimire û ji bîr dike bijî.

Heke jiyana ne xweş, mirov xwe li ber nagire; heke xweş be, mirov xwe li ber nagire ku wê ji dest bide. Encam her eynî ye.

Yê nemerd û tema hemî malê xwe bi carekê ji dest dide - dema dimire.

Di dinyayê de tenê du awa hene ku mirov dikare pê hîlbikeve: zîrekiya xwe û nezaniya xelkê.

### **Jean de La Fontaine**

Ti kes mîna hevalê nezan xeter nîn e, dijminê bîaqil pîr çêtir e.

Herkes bi asanî sanahî ji wî tiştî bawer dike yê dixwaze yan jê ditirse.

Em kêmasiyên xwe dixin paşberîkê û yên xelkê dikin pêşberîkê.

### **Ronald D. Long**

Pêwîstiya mirov herdem bi rekehan nîn e. Raman jî dikarin me girtî bihêlin.

### **Charles Lamb**

Yê gramek jî dînî û şêtî tê de nebe, bi kîloyan xerabiyên din tê de hene.

Wêje gulteyek bed lê gopalek baş e.

### **Laotse**

Ew zengîn e yê bi para xwe razî.

Yê pirr berhev dike, pirr ji dest dide.

### **François de La Rochefoucauld**

Me hemiyar hind şîyan û hêz heye ku xwe li ber belayên bi serê kesên din hatine bigirin.

Em li gor hêviyên xwe soz didin û li gor tirsên xwe bi cî tînin.

Dêbav şîretên qenc didin zarokên xwe ji ber ku êdî nikarin nimûneyên xerab bin ji wan re.

### **STANISLAW JERZY LEC:**

***Binere:***

<http://www.geocities.com/kmehname2002/34/divari1.html>

### **Vladimîr Lenîn**

Yek ji mezintirîn û xetertirîn tewanên şoreşê guherandina konkretê bi abstraktê ye.

Hêza edetê milyonan û dehan milyonan tirsaktirîn hêz e.

Şoreş li Îtalyayê û Rusyayê mîna hev nameşe.

### **Carl Gustaf af Leopold**

Xwe bitewîne li ber yê dîn, lawê min, lê kûr, wisan kûr ku ew bişira te nebîne.

### **G. C. Lichtenberg**

Amade me malê xwe bidim heke ji min re baş bê şirovekirin ka ew kirin bo kê hatin kirin ên bi fermî tê gotin ku *bo welat û niştiman* hatine kirin.

Hema ne gengaz e mirov pizot û pêtala rastiyê di nav girseyê re bibe bê ku riyê kesekî bişewitîne.

Yezdan jî di afirandiyan re tenê xwe dibîne.

Em li dinyayekê dijîn ku her qeşmerek gelek kesan dike qeşmer lê hişmend tenê kê m kesan dikin hişmend.

Yek ji mezintirîn peydake û keşfên vê dawiyê hiş mirov çêkiriye, bi baweriya min, ew huner e ku mirov wan pirtûkan rexne dikin ên ticarî nexwendine.

Ax, dê jiyana gelek kesan çend bextiyarane bûya heke karûbarên xelkê jî hindî karûbarên wan bi xwe kê m bala wan bikişanda.

Gorr baştirîn asêgeh e hemberî bahozên felekê.

### **Abraham Lincoln**

Pirraniya mirovan hind bextiyar in hindî bixwazin.

Yê alîkarî dike, mafê wî heye rexne jî bike.

Xwedê ji mirovên sade hez dike lew Wî pirr ji wan afirandine.

Ez bo reşikan ti tiştî ji we naxwazim ji bilî hindê ku heke hûn ji wan hez nekin jî, bela xwe nexin serê wan. Heke Xwedê piçek dabe wan, hema wê piçekê ji wan re bihêlin.

Ez nizanim ka bapîrê min kî ye lê pirrtir bala min dikişîne ka neviyê wî dê bibe çî.

Mirov hêvî dîkin ku bikarin bi herherî bijîn. Lê di heman demê de gazinan dîkin ku nizanin ka çawan semî û yekşema xwe derbas bikin.

### **John Locke**

Şik ji helwest û ramanên nû tê birin û dijberiya wan tê kirin, û bi pirranî sedem ew e ku ew hê nebûne helwestên giştî.

### **Jack London**

Evîna romantîk çêkîrok e û dijî pergal û sazimana sirişt û xwezayê ye.

Soyalîzm ne ti pergalek îdeal e ku armanca wê bextiyarkirina hemî mirovan be. Armanca wê ew e ku hin nijadên lêzimî hev bextiyar bike, wan nijadên jorîn bihêz bike daku ew bijîn û serdestiya dinyayê bikin ta ku nijadên bêhêztir, lawaztir bitelifin û bimirin.

### **Henry W. Longfellow**

Spêde çend nêzîktir be, şev hind tarîtir e.

Li şûna mirov ravebike ka çima tişteke bi nebaşî kir, dikare zûtir wê bi başî bike.



### **James Russell Lowell**

Kompromîs sîwanek baş lê banek bed e.

Ya herî dijwar ew e ku mirov xwe li ber wan belayan bigire yê ticarî bi serê mirovî nayên.

### **Luqmanê Hekîm**

Kurê min, bila taybetmendiyên xerab ên birayê te nebin rêgir li ber baskirina taybetmendiyên wî yê qenc.

### **Martin Luther**

Derew mîna gog û gulmiçka befrê ye: çend dagerînî, hind mezintir dibe.

Ji ramanan gumrik nayê standin.

Sê seyên har hene: bêminetî, pozbilindî û hesûdî. Kesê ev her sê se wî bigezînin, mala wî wêran bû.

Dinya mala Şeytan e. Kû ve biçî jî, dê rastî xwediyê malê bê.

Dinya mîna gundiyek sermestbûyî ye: ji aliyekî li ser kurtan rast bikî jî, di aliyê dî de dikeve.

Yezdan bênfîre, baldîrêj û dilovan e ku dikare wisan deng neke û bi aramî lê binere ka zalim û zordar çi dikin û wan cezane kirî dihêle. Ez nikarim.

Bextiyarî ji bextreşiyê pirrtir mirovan diruxîne.

### **Niccolo Machiavelli**

Heke mirov tê bikoşe hertim qencyê bike, dê di nav koma boş û mişe ya xerabîkeran de têkçûyî bimîne.

Ti tiştêk hindî merdî û camêriyê mala mirov kembax nake çimkî heke wan bikî, dê hêdî-hêdî derfet û delîvên kirina wan ji dest bidî.

### **Henry Mackenzie**

Ji hemî cilan, ên pozbilindî xwe pê diniximîne, sernermî ji hemiyên zêdetir dilê min reş dike.

### **Maurice Mackenzie**

Paşeroj hertim li vir e.

Ez zarok di xew diçim û pîr şiyar dibim. Em li dorberî landik û dergûşanê diçerixin û ha dibînin ku em li ber gorra xwe ne.

### **Norman Mailer**

Bila her nivîserî maf hebe derewên xwe vebibêje.  
Aha ew e azadiya çapemeniyê.

Rûyê rastgo dikare rast be yan jî sexteyek hostane  
be.

### **Xavier de Maistre**

Neynik herdem bêalî û rastgoyane gulên ciwaniyê û  
qurmiçkên êxtiyariyê diteyisîne bê ku galteyan bike  
yan me navdar bike. Neynik tekane şêwirmenda  
mezinan e ya rastiyê dibêje.

### **Vladimîr Mayakovskî**

Dixwazim qelem wek nişterê bê hesabandin.

Tenê "em ji we fam nakin" ne ti gazin û lome ye.

Vladimîr Mayakovskî. Trajedî. Ji pênuşa Vladimîr  
Mayakovskî.

### **André Malraux**

Hemî huner serhildan e dijî qedera mirovan.

Rastî diselimîne ku ne teoryên marksîstî lê  
Nietzsche rast digot - wî digot ku sedsala 20ê dê  
bibe dê bibe sedsala şerên neteweyî.

### **Mao Zedong**

Leşkerê bê çande leşkerek nezan e, û leşkerê nezan nikare dijmin têk bibe.

Yê komunîst divê hevalê cemawer û girseya gel be, ne serokê wan, divê mamosteyek bêwestan be, ne siyasetvanek bûrokratîk.

### **Don Marquis**

Heke kesek bibêje ku malê xwe bi xebatek dijwar berhev kiriye, jê bipirse: "Bi xebata kê?"

Raman ne berpirsiyar e hemberî wan ên ji wê bawer dikin.

Helbestvanî ew e ya Milton dît dema kor bû.

Nivîsîna dîwana helbestan mîna hindê ye ku mirov gulekê ji çiyayek bilind biavêje geliyekê û bendewarî dengê ketina wê bimîne.

### **Groucho Marx**

Min wêneyê xwe nîn e lê dikarim şûnpiyên xwe bidim we. Ew li qata jor di goreyên min de ne.

### **Karl Marx**

Qet nebe, tişteke misoger û esehî ye, ew jî ew e ku ez ne marksîst im.

Gelê gelan kole dike, nîr û zincîrên xwe bi destê xwe çêdike.

Sererastnekirîhiştina şaşîyan rêxweşkirina li ber bêaqîliya ronakbîrî ye.

Dîn tilyaka gel e.

Nezaniyê ticarî alîkarî kesekî nekiriye.

Pare hemî xwedayên mirovan ji ser text û tacan diavêje û wan dike malê firotinê.

Ne xweş e mirov xulamîyê bike, heke bo azadiyê jî be, û li şûna bi mîrkut, bi derziyê şer bike.

### **Somerset Maugham**

Mirov dawaya rexnegiriyê dikin lê tenê pesnan dixwazin.

### **André Maurois**

Bazirganî têkilkirina şer û werzişê ye.

Hertiştê bi daxwazên me re lihevkerî be, ji me re rast dixwiye. Hertiştê berevajî hindê me dienirîne.

Tekane tiştê tecrûbe me fêr dike ew e ku tecrûbe me fêr nake.

### **Marshall McLuhan**

Tiştê em wek realîzmê dihesibînin ji rusiyan re fantaziya pak e.

### **Enes ibn Melik**

Bixwînin, xweh heke hûn neçar bimînin bo hindê biçin Çînê jî çimkî xwendekarî erkê her misilmanî ye.

### **H. L. Mencken**

Guneh e ku mirov bawer bike ku xelk xerab e lê kêman caran şaşî ye ku wisan bawer bike.

Li vê dinyayê zelam bi gelek awayî ji jinan di rewşek baştir de ne. Yek, zelam derengtir dizewicin. Du, zûtir dimirin.

Dijwar e bê bawerkirin ku kesek rastiye dibêje heke mirov bi xwe dê derew bikirana heke li ciyê wî bûya.

Dêr ew cî ye yê kesên ticarî neçûne biheştê basa wê  
dikin ji wan kesan re yên dê ticarî neçinê.

Nojdar ji êşên çermê leşî hez dikin: ne sax dibî ne jî  
dimirî.

Çend pîrtir dibim, kêmtir bawer dikim ku pîrî bi xwe  
re aqilmendiyê tîne.

Ka gorristana xwedayên mirî?

Heke siyasetvan bibihîze ku hilbijêrên mirov xwer  
hene, ew dê soz bide wan ku xwarina bi dilê wan jê  
re peyda bike.

### **Mihemed Pêxember**

Ew bihêz e yê bikare xwe.

Serokê gel divê xulamê gel be.

Kirin li gor armancan!

Yê me bixapîne ne ji me ye.

Yê şîretan bipirse dê neruxe.

Ji temahiyê xerabtir êş nîn e.

Yê navîn ji sêyan ê herî baş e.

Ew ne biîman e yê ziktêr dinive û cîranê xwe birsî  
şiyar dihêle.

Dilê pîran jî mîna yê ciwanan du tiştan dixwaze:  
jiyek dirêj û gelek pare.

Yê derd dişîne, dermanê derd jî dihinêre.

### **John Stuart Mill**

Ji xwe bipirse ka tu bextiyar î, êdî tu dê ne bextiyar  
bî.

Zewac tekane şeweyê koletiyê ye ku li gor qanûnên  
me azad e. Êdî ti *kole* nîn in ji bilî *xatûnên* malan.

Ma ticar hêz an serdestiyek hebûye ku li ber wan  
kesan nesiriştî û neheqî ye yên ku wê hêzê bi rê ve  
dibin.

Şaşiya asayî ya sosyalîstan ew e ku ew li ber çav  
nagirin ku mirov jixwe sersar in.

### **Henry Miller**

Mirov, ên ji ti tiştî bawer nakin, berg û cildên zanistî  
li ser wan xwedayan dinivîsin ên ticarî nebûne.

Dil e serdestî dinyayê, ne mejî.



Şeref e ku mirov xwe di ber tişteki de bike cangorî,  
lê mirî nikarin ti bikin.

Heke em hema bikarin rojnameyan bitelêfin, ew  
gavek mezin e ber bi pêş.

Heke mirov dev ji hindê berbidin ku ew dê rojekê  
bibin xweda, ew dê bibin kirmik.

### **John Milton**

Rewa ye ku heq û hiqûqet ji zordest û serokên xerab  
bê derxistin û ew ji serdestiyê bîn avêtin û bîn  
kuştin.

Baştir e mirov serbest be li Dojehê, ne bindest li  
Biheştê.

### **Helmuth von Moltke**

Aştiya herherî tenê xewn e, û ne xewnek xweş jî.

### **Michel de Montaigne**

Nojdar ne kêfxweş e bi saxlemiya dostên xwe.

Baş dizanim ka ji çi direvim lê nizanim ka li çi  
digerim.

Ax çend tişt duh baweriyên dînî bûn û îro çîrok in.

Jiyan xewn e: dema em dinivîn, em şiyar in, û dema em şiyar in, em di xew de ne.

### **Montesquieu (Charles du Secondat)**

Şêt û dîn carinan di şêtxaneyan ve tîn girtin daku bi yê li derve bîn bawerandin ku ew ne dîn in.

Cidî bextiyariya bêaqilan e.

Gel herdem jî qanûnên xwe diwartir berevaniya edetên xwe dike.

Gavekê rastî ye, gavekê şaşî.

Zalimtirîn zordestî ew e ya li ber sîbera qanûnan û li pişt rûpoşê dadê tê kirin.

### **Henry de Motherland**

Dema rexnegir nivîskarî dixeyidîne, ew nirxandin e.  
Dema nivîskar rexnegirî dixeyidîne, ew îftîra ye.

### **Sir Thomas More**

Qertal û meymûn jî zarokên xwe jî hemî yê din delaltir dihesibîne.

### **Ebdillah ibn el-Mubarek**

Şaşıyên zimanî di peyivînê de kirêttir in ji rûyê girrewî.

### **Mucahid**

Heke mamoste ji şagirtên xwe re ne dadperwer be, ew jî ji zordestan e.

### **Ce'fer ibn Muhemmed**

Baştir e poşman bibim ku min bexşand, ne ku min ceza kir.

### **Wehb ibn Munebbih**

Yê bê sedem pesna te bide, dikare bê sedem te lome jî bike.

### **Ibn el-Muqefe'**

Heke te bihîst ku hevalê te tişteki dibêje yan tişteki dike ku kêfa te jê re tê, wê gotinê neke ya xwe. Bes e ku tu wê gotinê ji bîr nekî û ji xelkê re bibêjî û diyar bikî ka ya kê ye.

### **Se'îd ibn el-Museyyeb**

Baştir e ku serok di efûkirinê de, ne di cezakirinê de şaş bibe.

### **Robert Musil**

Pêşketin dê pirr baş ba - bes heke bisekiniya.

### **Alfred de Musset**

Jin mîna sîberê ye: heke bixwazî bigihiyê, ew direve, heke jê birevî, ew dide pey te.

### **Benito Mussolini**

Heke hertişt baş bimeşe, piştî sî salên din li her meydanekê dê peykelek min hebe, û evîndar dê bibêjin: êvarê saet heşt li ber peykelê Mussolini.

### **Xelîf ibn el-Mu'tez**

Zana li herderê xerîb in çimkî nezan li herderê pirrtir in.

Yê hesûd bi xwe cezayê xwe ye.

Heke tu zana bî, nefikire ka çend kes ji te kêmtir  
zana ne lê ka çend ji te zanatir in.

Fesadker pirek e ku dibe xerabiyê.

Rûyê bexşandinê bi lomeyan kirêt neke.

Zanîn bê kirin mîna dara bêfêkî ye.

Derewker ji hindê diyar e ku dixwaze sond bixwe  
tevî ku kesekî hêvî jê nekiribe jî.

Hind berz û bilind be ku xwe pozbilind neke.

Hêvî xweşheval e: heke wê bi dest nexî jî, te lezet ji  
bendewariya wê dîtiye.

Yê şîretan dipirse li ser rêya biserketinê ye.

Dilê yê hişmend kela nehîniyan e.

Heke bi dostanî û xweragiriyê negihî hêviyên xwe,  
dê bi çi bigihiyê?

Guhdarê fesadkeran jî yek ji fesadkeran e.

Zanîna mirov ûcax û dûndeha wî ya her-sax e.

Derfet zû diçe lê hêdî vedigere.

Zimanê yê nezan kilîlê ruxandina wî ye.

Kerba yê bêhiş ji gotinên wî, kerba yê bihiş ji kirinên wî diyar e.

Hişmendiya katib di serikê pênuşa wî de ye.

Ne herkes, ê sozên delal dide, wan bi cî tîne.

Heke şaşî neba, rastî dê ne ronahî ba.

Jiyan bi emanet dide û emanetê xwe dîsan dixwaze:  
yê bi dilxweşî nede, dê bi zorê bide.

Yê xerab ti qencyê di kesên din de nabîne ji ber ku bi çavên giyana xwe li wan dinere.

Şîreta dost ders e, ya dijmin lome ye.

### **Napoleon Bonaparte**

"Nabe" peyvek e ku tenê di ferhenga nezanan de heye.

Welat çend dîndartir be, li wir pirrtir guneh tên kirin.

### **Pablo Neruda**

Ax, xwezî bi dilopek helbestê yan evînê me bikariya kerba dinyayê vebimirînin lê tenê şer û dilê bibiryar dikarin wisan bikin.

Dixwazim bi te re wê bikim a bihar û dargilyaz bi hev re dikin.

Ez dogm di bin kefşî ve nagerim daku wê li serê yekî bidim.

Hesûdî dikare bi xwe pîşe û mihne û meslek be.

### **Friedrich Nietzsche**

Mirov bi tenê be, dê xwe bi xwe bixwe; di nav xelkê de be, ew dê mirovî bixin. Bibijêre!

Jin şaşiya *duyem* bû ku Xwedê kir.

Bê muzîk jiyan dê şaşî ba.

Divê mirov neçe dêrê heke bixwaze bên bike hewayê paqij.

Di rewşên aştî û aram de mirovê şerxwaz êrişî xwe dike.

Yê dijî zordaran şer dike, bila hişyar be ku ew bi xwe pê ve nebe zordar.

Di her partiyê de kesên wisan hene ku zêde bi dilsozî îdeolojiya partiyê îlan dikin û wiha dibin sedema ku kesên din ji partiyê vediqetin.

Ramana xwekujiyê xemrevîniyek xurt e: bi wê mirov gelek şevên nexweş diborîne.

Dînî û dûraqilî di takekesan de kême - lê di koman,  
partiyên, serdeman de normal e.

Bêaqilî û xayînî zêde dibê - ew jî beşek ji  
"pêşketinê" ne.

Divê parsek û xwestok bînin telifandin. Nexweş e  
mîrov bide wan û nexweşê nediyê.

Pêwîstiya hema her siyasethanî carinan wîsan pîr bi  
mîrovek rastgo heye ku ew mîna gurê bîrsî xwe  
werdike nav mexelê pez lê ne daku beranê girtî  
bixwe lê daku di nav piştê wî ya têrî re xwe  
veşêre.

Û pa çî bû ku pakiya keçikê parast? Hewara wîdana  
wê? Na, na. Dengê çîran.

Mîrov bi tenê hind xemgîn bû ku neçar ma kenîne  
peyda bike.

### **Nûşîrwan**

Betalî ramanan radike, raman serhildanê.

Li wî warî bi çî nebe yê ev pênc tişt lê nebin: serdarê  
bihêz, dadgerê dadperwer, bazargeha geş, nojdarê  
(bijîşkê, dixtorê) xwenda û ava diherike.

### **José Ortega y Gasset**



Mirovên garranî zîtkan diavêjin dema aqilê wan nameşe.

### **George Orwell**

Gotinên siyasî yên serdema me bi pirranî ji sloganên bi hev ve girêdayî pêk tên.

Hemî mirov wekhev in lê hinek ji yên din wekhevtr in.

Azadiya giyanî ew e ku mirov azad be tiştên dibîne, dibihîze û hest pê dike zêde bike û neçar nebe hest û rastiyên xeyalî çêbike.

Hemî katolîk û komunîst bawer dikin ku mirov nikare di heman demê de hem rastgo û hem jî jîr be.

### **Thomas Paine**

Qeşe û sihirbaz endamên heman sendîkayê ne.

Niştimanê min dinya û dîne min qencîkirin e.

### **Samuli Paronen**

Feqîran hemî şerên dinyayê kirine, hemî ew şer dijî feqîran kirine.

Pirraniya aqil bi tiştên pûç ve xerc dibe.

Dinya tijî ye ji kirinên kesekî nekirî.

Kamiranî nikare bê Fînlandayê, jê re xanî nîn e.

Qanûn û fermanên herî dijwar li wir in ciyê talanker  
û mirovkuj qanûndaner û femandêr in.

Heke rastgiran wek dibêjin bikira, ew dê çepgir ban.  
Heke çepgiran wek dikin bigota, ew dê wek dilê  
rastgiran bipeyivîne.

Hemî kole naxwazin azad bin, pirraniya wan tê  
dikoşin bibin axa.

Mirov di deriyên vekirî re dikevin diktatoriyê. Derî  
tên girtin. Tenê bi şkandinê mirov dikarin  
derbikevin.

Şeytanê reben: şehîdê nepîroz.

### **Blaise Pascal**

Ne baş e ku mirov zêde azad be. Ne baş e mirov  
bigihe her tiştê bixwaze.

Hemî mirov eslen hev dinifirînin.

Heke hemiyan bizaniya ka çi basa wan tê kirin, dê li  
dinyayê çar heval neban.

Exlaqê rastîn bi exlaq dikene.

Mirov rûl e, naziktirîn rûla siriştê, lê ew rûl dirame.

Tenê du celeb mirov hene: mirovên dadperwer ên xwe gunehkar dihesibînin, û mirovên gunehkar ên xwe dadperwer dihesibînin.

Dema em hazir bin, kes wisan basa me nake wek dema em ne li wir bin.

Min dixwest hevokek ji min revî binivîsim lê li şûna hindê dinivîsim ku hevokek ji dest min revî.

Mirov wisan bêçare dîn in ku heke kesek ne dîn be, ew jî tenê şêweyek nû yê dîniyê ye.

Dil sedemê xwe heye yê aqil nas nake.

Heke bixwazî xelk bi qencî li ser te bifikirin, bi qencî basa xwe neke.

Dinya tijî ronahî ye bo wan ên dixwazin bibînin û tijî tarîfî ye bo wan ên dixwazin nebînin.

### **Borîs Pasternak**

Siyaset ti tiştî nade min. Ez ji wan kesan hez nakim ên hemberî rastiyê sersar in.

Giyangarranî penageha bêbehreyan e - vêca ew dilsozên Slovyev, Kant an Marx bin.

### **Heinrich Pestalozzi**

Bi sedan kes şûrên xwe, bi bi hezaran kêrên xwe dihesûn lê bi dehan hezaran mirov mejiyê xwe kuh dihêlin ji ber ku wî bi kar naînin.

### **Sándor Petoti**

Xem çi ye? Derya ye. Pa şadî? Dilopek di hemêza wê de.

### **Pablo Picasso**

Huner ew derew e ya me di rastiye digihîne.

Li ber gelean çande û kultûr ew e ku xaniyek nûjen tijî tiştên kevnare bikin.

Di rastiye de Yezdan jî hunermend e. Wî zerafe, fil û pisîk afirandine. Wî ti stîlek rastîn nîn e. Ew jî tenê xwe diceribîne.

Ez lê nagerim, ez dibînim.

### **Platon**

Aha ew kes bîaqil bû ye rabû Xwedê çêkir.

Beden gorra giyanê ye.

Mezintirîn bêdadî dadperweriya qestayî ye.

Nerîna bi çavek wekhev li kesên newekhev  
newekheviyê peyda dike.

### **Plutarkhos**

Ew pend rast e ya dibêje: bi seqetan re mirov fêrî  
kulekiyê dibe.

Tevî ku kurik bo kêfa xwe keviran li beqan didin,  
beq ne bo kêfa xwe dimirin.

### **Edgar Allan Poe**

Mirov min dîn dihesibînin lê hê nehatiye  
çareserkirin ka dînî gewertirîn jîrî ye yan na.

### **Channing Pollock**

Rexnegir kesên bêpê ne yên mirovan fêrî bezê dikan.

### **Alexander Pope**

Şaşbûn mirovaneyî ye, lêborîn yezdaneyî.

Di dîrokê de zêdetir nimûneyên seyên dilsoz ji mirovên dilsoz.

### **Jacques Prévert**

Ey Yezdanê tu li erş û esmanan / li wir bimîne / û em jî dê li ser rûyê dinyayê bimînin.

### **Pierre-Joseph Proudhon**

Demokrasî kêfiya makeqanûnî ye.

### **Marcel Proust**

Her tiştê mezin li vê dinyayê dîn û şêtan kiriye; ew bûn ên olên me damezirandin û şaheserên me afirandin.

### **Pubilius Syrus**

Jiyan bi xwe kurt e lê bela wê dirêj dikin.

Dadiya bêsinor hema hertim neheqiya bêsinor e.

Deynê biçûk dike heval, deynê mezin dike dijmin.

Yê hesûd tenê qencyekê dike: dimire.

Yê newêrek dibêje ku sexbêr e.

### **Pythagoras**

Bêdeng be yan tiştekek hêjayî gotinê bibêje.

### **Ibn el-Qirriye**

Peyva nivîskî li herderê, li hemî deman tê xwendin û ew li hemî zimanan tê wergerandin lê peyva devkî ji guhên guhdar dûrtir naçe.

### **Tebit ibn Qurre**

Xwarina kêmbedenê rehet dike, gunehên kêmbedenê didin giyanê, xemên kêmbedenê aramiya dil in û axiftina kêmbedenê bîvedana ziman e.

Bo pîremêran ti tişt ne hindî xwarinçêkerên jêhatî û jinên delal bela ne çimkî hingê ew gelekî dixwin û nesax dibin, gelekî digên û pîr dibin.

### **Wilhelm Raabe**

Niha gulên dibin ciyê berê tif dibirinê.

### **François Rabelais**

Nezanî maka hemî şaşiyên e.

### **Wilhelm Reich**

Yê kulek dikene dema yê beza dikeve.

### **Ernest Renan**

Xewnên me baştirîn û xweştirîn beşa ji me ne. Di wan de em herî zêde xwe bi xwe ne.

### **Jules Renard**

Li şûna mirov ji kesûkarên xwe hez bike, bêserêştir e ku mirov ji Yezdan hez bike; erzantir e.

### **Elî ibn Remses**

Danûstandin gelek aqilan digihîne hev.

### **Will Rogers**

Hertişt xweş e heke bi serê kesek dî bê.

Çawan em dikarin bibêjin ku şaristanî pêş nakeve tevî du ku her şerî de bi awayek nûjentir mirov tên kuştin.

Ez ti henekan nabêjim - tenê çavdêrî hukumetê me û rastiyan radigihînim.



Hindî zêdetir li ser siyasetê bixwînî, amadetir î îtîraf bikî ku her partî ji ya din xerabtir e.

Dewletên Yekbûyî yên Amerîkayê di ti şerî de têk neçûye û di ti danûstandinan de bi ser neketiye.

### **Jean-Jacques Rousseau**

Mirov azad hatiye dinyayê, û li herderê zincîrkirî ye.

Azadî ne fêkiyê her kişwer û avûhewayê ye ler ne berdestî hemî mirovan e.

Mirovo, li yê xerabîkar negere: tu bi xwe yî.

Ez ji pirtûkan hez nakim: ew me fêr dikin bipeyivin ji wan tiştan ên em tê nagihin.

Heke ez serok an qanûndaner bam, min dê wexta xwe neboranda bi hindê ku fermanan bidim daku tişteke bê kirin. Min dê bi xwe bikira yan ez dê bêdeng bam.

Yê bêaqil jî difikire lê piştî ku dixebite.

### **John Ruskin**

Hin kole bi pare, hin jî bi nazdariyan tîr kirîn.

### **Bertrand Russell**

Tevî ku hemî pispore hemfikir bin jî, dîsan jî dibe ku ew şaş bin.

Ev jî serdema şerên olan e lê vê carê navê ol "îdeolojî" ye.

Di demokrasîyê de dîn û şêt hildibijêrin, di diktatorîyê de ew hukumdar in.

### **Antoine de Saint Exupéry**

Şer ne macera ye. Şer nesaxî ye.

### **George Santayana**

Yên paşeroj ne li bîra wan be, neçar in wê dubare bikin.

Fanatîzm ew e ku têkoşîna xwe xurttir dike dema armanca xwe ji bîr kiriye.

### **Friedrich von Schiller**

Herkes bi serê xwe hinekî jîr û hişyar e lê dema em li kom û girseyan dinerin, hemî dûrî aqil in.

Kelemçe ji polat be yan ji armûş (hevrişm), her kelemçe ye.

### **Carl Schmitt**

Diktatorî demokrasîya rastîn e.

### **Arthur Schopenhauer**

Em kême caran difikirin ka me çi heye lê em hertim serê xwe pê ve diêşînin ka çi ji me kême e.

Li parzemînên din meymûn hene. Lê em jî bêpar in: li Ewropayê fransî hene.

Felek karteyan têkil dike û em dilîzin.

Tenê guherîn berdewam e.

### **Sir Walter Scott**

Bo yê newêrek û biguman ti tişt ne gengaz e çimkî wisan dixwiye.

### **Ibn es-Semek**

Heke sê tişt neban, dê ticarî şûr bi kerb ji kevlanê nehata kişandin: qumaşên delal, rûyên xweşik û xwarinên çêjdar û bitam.

### **Lucio Seneca**

Asta dawîn a şerpezetî û tengezariyê ew e ku mirov hingê jî ditirse dema dikare bihêvî be.

Yê xwe radestî tirs û xofên hewante bike, dê bikeve ber ên rastîn jî.

Heke yê tewanker bê efûkirin, ew dê herdem ji efûker bişik be.

Bejnbest biçûk e heke li serê çiya be jî. Girs jî girs e heke di binê bîrê de jî be.

Koletî kêr kesan berbend dike, pirranî kes bi xwe xwe berbend dikin.

Di hertiştî de sedema ken an girî heye.

Kêmasiyên kesûkarên me li ber çavên me ne, yên me bi xwe li pişt pişt me ne.

### **William Shakespeare**

Çav xwe nabîne heke ne di tişteke din re biteyise.

Heke her kes bigiha heq û mafê xwe, kes dê bê lêdan nemaya.

Mala te, şans çi qehbok e, ti tiştî nade feqîran.

Tirsonê gelek caran dimirin berî mirinê, wêrek tenê carekê tam dikin mirinê.

Wey li wî yê dereng poşman dibe.

Xwehezî ne gunehek hindî xwebiçûkdîtinê mezin e.

Hişyarî xwemezinkirinê be; firîşte jî pê ketin.

Bo berjewendiya xwe şeytan dê încilî jî werbigêrîne.

Kerê mejîreş bi lêdanê jî nalezîne.

Di guhê yê bêaqil de gotina yê bîaqil di xew diçe.

Dema xwe ji xerabiyekê vedî, yek din bi ser te de tê.

Dilsozî bi kirinan e, ne bi gotinan.

Em dizanin ka em çi ne lê em nizanin ka em dê bibin  
çi.

Dîn, evîndar û helbestvan her sê aşopboş in.

Xwedê ne gotinan lê dil ji te dixwaze.

Spasiya herdemî - ew e meaşê feqîran.

Peyivîn tenê pifîn e.

Yê îsal bimire, ne pêwîst e sala bê bimire.

Ji hemiyar hez bike lê bi kêman bawer be.

Dema xem t n, ew ne bi ten  dimeŝin m na s xuran  
l  bi ref   garran t n.

### **G. B. Shaw**

D n li herder  hene, li ŝ txaneyan j .

Ten  d nek (olek) heye, tev  ku sed ŝ we j  hene j .

Bextiyariya tevtemen ! Ti benderuhek d  xwe li ber  
negire: d  cehenema serdinyay  be.

Qayde   r çika z r n: ti qayde   r çik n z r n n n in.

Ez ate st im, mala Xwed  ava.

Huner tekane mamoste ye, d v iŝkencey  re.

Ez cam r im: debara xwe bi ŝelandina hejaran dikim.

### **P. B. Shelley**

Mirov k masiy n xwe z tir di kes n din de dib ne.

### **Ibn S nan**

Ber  xwe bide xwe bi xwe daku xelk k masiy n te ji  
te bi xwe baŝtir nas nekin.

### **Adam Smith**

Mirov heywanek bazirgan e; ti heywanek din wisan nake - se jî hestiyan bi hev naguherînin.

### **Sydney Smith**

Cerrahî pêwîst e ta ku mirov bikare henekekê bixe serê skotiyan.

### **Sokrates**

Mirov! Xwe binase, ew destpêka hemî hişmendiya jîyanê ye.

### **Aleksandir Solyenîtsin**

Ax li wî miletî yê zordarî li wêjeya wî tê kirin. Ew ne tenê talankirina azadiya gotinê lê zincîrkirina dilê wî, fetisandina bîra wî gelî ye.

### **Herbert Spencer**

Îbadetê qehremanan herî zêde li wir heye yê azadiya mirovaneyî hatiye bînirxkirin.

### **Baruch Spinoza**

Tişt a tu ji yê din re hêvî nekî, ji xwe re jî hêvî neke.

Vîn û hiş ango îrade û aqil heman tişt e.

### **Charles Spurgeon**

Ta rastî sol û pêlava xwe dike pê xwe, derew li dor dinyayê digere.

Ji du xerabiyên tiyan nebijêre.

### **Stalîn**

Divê stoyê Şeytan bi şûrê wî bi xwe bê qetkirin.

Her roj li sosyal-demokratên bixin.

Carekê qijereşkê jî sorgul dît lê ew nayê wê wateyê ku qijik bilbil e.

### **Stendhal (Henri Beyle)**

Bistehî ango wêrekî ew e ku mirov biwêre xerabiya biçûktir bibijêre, çend xerab be jî.

### **Adlai Stevenson**

Siyasetvan ew kes in ên devbeş nêzî her pirsgerêkê dibin.



### **Robert Louis Stevenson**

Mirov afirandiyek e ku ne tenê bi nan lê herî zêde bi dirîşm û sloganan dijî.

Em çend zêdetir pal bidin aqilê xwe, em hind kêmtir ji jiyane fam dikin.

Herkes bi firotina tişteki dijî.

Zalimtirîn derew pirrî caran bi bêdengmanî tên kirin.

Diyar e siyaset tekane kariyer e ku mirov dikare bê perwerde bigihîyê.

### **Max Stirner**

Dewletê herdem tenê armancek heye: takekesan bisinor bike, wan girê bide, bindest bike, berjewendiyên hevbeş deyne pêş ên takekesan.

Em dijminên hev ên jidil in, ez û dewlet.

Rojbaş Ez!

### **el-Muhelleb ibn ebi Sufre**

Bexşandeyî baştirîn taybetmendiya mîr e.

### **Jonathan Swift**

Kes ne hindî wî kor e yê naxwaze bibîne.

Nazdarî lezeta ehmeqan e.

Kêm heywanên har û dirrinde hindî mirovên lewçe tirsnaq in.

Dema bilîmet dahiyek rastîn tê dinyayê, ji hindê diyar e ku hemî ker dijî wî bûne ye.

Henek core neynikek e ku temaşevan pirrî caran rûyê her kesî tê re dibînin, ji bilî yê xwe.

Qanûn mîna tevn e, mêş dikevinê lê stêng û zirkêtk tê re derbas dibin.

### **A. C. Swinburne**

Xerabiyê got Qencyê: birako.

### **Mehmûd Şaristanî**

Dijwartir e mirov xwe rabigire ji xerabiyên jê hez dike ku xwe rabigire li ber ên jê hez nake.

### **Se'diyê Şîrazî**

Heke hişyarî li dinyayê nemîne jî, kes dê şikan ji xwe nebe ku bi xwe bêhiş e.

Deh mirov dikarin ji sêniyekê bixwin lê du se jî nikarin li ser kelexek mirar li hev bikin.

Gel leşkerê padişahên dadperwer e.

Cudatiyek mezin di navbera wan de heye yê evîndar li ber dilî ye û yê çav li derî ye.

Ji wî bitirse yê ji te ditirse tevî tu bikarî di cengê de zora sed wek wî bibî jî.

Bi dizîkî basa wî tiştî neke yê nikarî basa wî bi serbestî jî bikî.

Heke pisîk nikare bireve, ew amade ye çavên piling derbîne?

Heke her şev Şeva Qedirê bûya, Şeva Qedirê dê bêqedir bûya.

Feqîr û zengîn mehkûmên vê herriyê ne, û yên dewlemendtir in, zêdetir pêwîstî bi alîkariyê heye.

Ma ne ew, ê li ber ên belengaz nakeve, ditirse ku heke bikeve, kes dê destê xwe neavêjîyê.

Heke belayên bi serê mirovan tên ne xema te bin, tu ne hêjayî navê mirovan î.

Bexişandin baş e lê birînên zordaran nekewîne. Yê mar efû bike, nizane ku neheqiyê li zarokan dike.

Ji yê sax re bibêjin, ew nikare bizane ka çi di dilê kovandarê evînê de ye.

Mala jin ne razîkirî ji ber mêrê xwe radibe tijî gengeşe û şerrenîxa hertimî ye.

Heke kalepîr bi xwe tenê bi gopal bikare rabibe, dê çawan gopalê wî bi xwe rabibe?

Dara dilceweriyê li kû reh û rîş bigire jî, çeq û gupikên wê digihin ber asmanan.

Ker, ê du-sê pirtûkan hildigire, ne lêkolîner û ne jî alim e.

Sernermî û serhişkî bi hev re herî baş in wek çawan derzî hem diêşîne hem dikewîne.

Ey bilbil, mizgîniya biharê bîne; bila nûçeyên reş xema quling bin.

Yê şîretan li serhişkan bike, bi xwe hewceyî şîretan e.

Ji nazdaran hişyar be çimkî ew tenê dixwaze ji te sûdedar bibe. Heke rojekê daxwazek wî bi cî neînî, ew ê dused kêmasiyan di te de bibîne.

### **Tacitus**

Dûrî mirov şîrîn dike.

### **Charles-Maurice de Talleyrand**

Tiştêk ji îffîrayê jî xerabtir heye: rastî.

Şer tiştêk wisan cidî ye ku nabe bi dest leşkeran bimîne.

### **Hubeyş et-Tebîb**

Derew despêka hemî dijwariyê ye.

### **Alfred Tennyson**

Zanîn tê lê hişmendî xwe gîro dike.

### **William Makepeace Thackeray**

Gelek car em pare zêde bi giranî distînin.

Tenê guherandina helwest û nerînê divê, û kirinên mezin jî erzanok in.

### **Henry Thoreau**

Min dê hinde basa xwe nekira heke min kesek din  
hinde baş binasiya.

Em tenê beşek ji jiyana xwe dijîn.

Roj dê hê geştir bibe. Hetav tenê stêrka spêde û  
elindê ye.

### **Ebu Se'd et-Tibrîzî**

Dewlemend ew e yê ne di bin nîrê hesûdiyê de ye.

Heke gelekî maddeyî bifikirî, ramanên te dê ji  
hişmendiyê stewr bibin.

### **Ibn et-Tilmid**

Zana, yê xelkê naelimîne, mîna zengînê tema ye.

### **Leo Tolstoy**

Dema qeşe zêrîn bûn, aman darîn bûn, lê dema aman  
bûn zêrîn, qeşe bûn darîn.

### **Leo Trotskî**

Dîrok rasterê pêş nakeve. Carinan li koreyên Stalîn  
diheziqe.

### **Mark Twain**

Cudatiya serekî di navbera pisîkê û derewê de ewe ku pisîkê tenê neh ruh hene.

Pêşî xwe jê agadar bike ka rastî çî ye. Paşî hindî bixwazî, dikarî bi kêfa dilê xwe wê berevajî bikî.

### **Paul Valéry**

Dîrok wê tiştê rast derdixe ya tê xwestin.

Heke dewlet bihêz be, ew me diperçiqîne. Heke bêhêz be, em ji bêxwedîtiyê dimirin.

Mezin ew kes e yê mirina wî xelkê bêçare dihêle.

Dîrok berhemek xetertir e ji hemî pêkînayiyên kîmyawî.

Rastî rût e lê di bin rûtiyê ve leşek hatî gurîn heye.

Em ticarî ne hind ji xwe razî ne ku xwe bi temamî îsbat bikin.

Dawiya dinyayê: Xwedê dê li paş xwe bizivire û bibêje: "Min xewnek dît".

### **François Villon**

Ka berfên salên borî?

**Voltaire (François-Marie Arouet)**

Ez qet ji qehremanan hez nakim: zêde deng ji wan derdikeve.

Tecrûbeyên heştê salan ez gihandime wê baweriyê ku mêş dibin xwarina tevpirkan û mirov xwarina xeman.

Helwest û boçûnan ji erdhejê û êşa reşavê zêdetir bela anîn serê vê dinyayê.

Heke Xwedê nebûya, diviyabû Ew bihata keşfê kirin.

Dinya şer e, yê tê de bi ser dikeve ew kes e yê li ser kîsê yê din dijî.

Di rojê de sed car derfet heye ku mirov xerabiyê bike lê salê carekê delîv heye ku mirov qencyê bike.

Mirov gengeşeyê dîkin, sirişt dixebite.

Hemî şer tenê li ser jihev dizîne ne.

Tenê du caran miflis û ripîrût mam: carekê dema li dadgehê min xesaret kir û carekê jî dema li wir bi ser ketim.

Dîroknas pîretewtên fesadker in ên bela xwe ji miriyan venakin.



Dema mesele pare ye, hemî xwe li ber eynî xwedayî ditewînin.

Mixabin bawer dikim ku dinyaya me ya biçûk şêtxaneyê gerdûnê ye.

### **Horace Walpole**

Dinya bo mirovên aqildar komedî, bo yên hestiyar trajedî ye.

Dema dîrokê dixwînim, carinan dilerizim, carinan jî kenê min tê.

### **Peter Weiss**

Mirov heywanê aqildîn e.

### **H. G. Wells**

Li dewleta koran tekçav padişah e.

Heke bi jiyana xwe nerazî bî, dikarî wê biguherî.

### **Oscar Wilde**

Dema xelk bi min re hemfikir be, bi min wa ye ku ez şaş im.

Dîrok tenê galegot û fitne û fesad e.

Dema xweda bixwazin me ceza bikin, ew bersiva diayên me didin.

Tecrûbe tenê navek e ku em li şaşîyan dikin.

Camêr ew e yê ticarî *bêdestî* xwe zîyanê nagihîne hestên ti kesî.

Wan mirovan, ên ku ferq û cudatîyê dixin nav bedenê û giyanê, ti ji herduyan nîn e.

Ciwan û bawer dikn pare hertişt e lê dema ew pîr dibin, ew dizanin ku wisan e.

Rastî kêmcarî paqij e û ticarî jî ne saf e.

Divê herkesek rojnivîska kesek din binivîse.

Yek nikare ticar dijminê xwe bi dilê xwe bibijêre.

Mirovê li xwe nefikire li ti tiştêk din jî nafikire.

Heke yek rastîyê bibêje, zû-dereng dê sera hindê bê girtin.

### **Tennessee Williams**

Jiyan mirovxwerî ye.

Mirovên îroyîn dixwazin jiyana dusibê bi bihayê pêr bijîn.

Heke mirovên takekes mîna neteweyan tev bigerin, ew dê bê virde-wirde di şêtxaneyan de bîn rizandin.

### **Sir P. G. Wodehouse**

Jiyan xaniyek e ku em diz ketiniyê. Bê vexwendin em tînê, çî dikeve ber destê me, em dişelînin û paşî em derdikevin.

Rêgezê gelek baş e ku mirov ticar dawa lêborînê neke. Mirovên qenc jixwe li mirov diborin û yên xerab jî dê lêborînxwaziya te bi şûmî ji xwe re bi kar bînin.

### **Nikîta Xruşev**

Pêşketina wêjeyê, hunerê û hemî çandeyê nikare bê astengkirin bi hejandina şiv û gopalan an qîrîna bang û fermanan.

Siyaset li herderê mîna hev in: soz didin piran ava bikin li wî cî jî yê av lê peyda nabe.

Talleyrand gotiye ku dîplomatan ziman heye daku bikarin ramanên xwe bixapînin. Heman tişt bo siyasetvanan jî dibe.

### **Sergey Yasenîn**

Ah, ji helbestvanan hez dikim. / Komê mirovên pirr  
pêkenok in.

Xem di meyê de naxeniqe.

### **Ebul-Ferec el-Yetlîq**

Hêvî xewnên yê şiyar in.

### **Yevgenî Yevtuşenko**

Helbestvanî jinek tolxwaz e, ew li nereseniyê  
nabexşe.

### **Edward Young**

Bi şev ateîst bi nîvî ji Xwedê bawer dike.

Yezdanê ji hemiyar re dilovan be, ne Yezdanê  
dadperwer e.